

DOMENIE XVI «VIE PAL AN»

Antifone di jentrade Sal 53,6.8

Ve, il Signôr al vignarà a judâmi,
il Signôr al ten sù la mê vite.
Cun dut il cûr ti ufrissarai il sacrifici,
il sacrifici di laut al to non ch'al è bon, Signôr.

Colete

Cjale di bon voli, Signôr, i tiei servidôrs
e multipliche sore di lôr i regâi de tô gracie
par che, ferbints te fede, te sperance e tal amôr,
a condurin tal meti in vore cun fedeltât i tiei comandaments.
Pal nestri Signôr Gjesù Crist to Fi, ch'al è Diu
e cun te al vîf e al regne dutune cul Spiritu Sant,
par ducj i secui dai secui.

PRIME LETURE Gjer 23,1-6

O tirarai dongje ce ch'al reste dal gno trop e o fasarai saltâ für par lôr pastôrs.

Dal libri dal profete Gjeremie

«Puars mai lôr i pastôrs, ch'a dispierdin e a fischin il trop dal gno passon!». Sentence dal Signôr!
Par chel il Signôr, Diu di Israel, al dîs cussì cuintri dai pastôrs ch'a passonin il gno popul: «Vualtris o vês dispierdût il gno trop, lu vês parât vie e no si sêts scomponûts. Ve chi ch'o soi: o pensarai jo par vualtris, pes vuestris tristeris, pes vuestris voris, sentence dal Signôr! Par chel che mi rivuarde, o tirarai dongje ce ch'al reste dal gno trop di dutis lis tieris là che ju ai dispierdûts e o tornarai a menâju tal lôr passon e a frutularan e si moltiplicaran. Po o fasarai saltâ für par lôr pastôrs che ju passonaran e no varan teme e no si spaventaran e no 'nt mancjarà nancje un». Sentence dal Signôr!
«Ve: a rivaran dîs – sentence dal Signôr! –
che jo o fasarai saltâ für par David un butul just
e al regnarà propit di re; al sarà savi
e al metarà in vore il dirit e la justizie inte tiere.
Tai siei dîs Gjude al sarà salvât
e Israel al vivarà sigûr in cjase sô.
Chest al è il non che lu clamaran:
“Signôr-nestre-justizie”».
Peraule di Diu.

SALM RESPONSORIÂL dal Salm 22

R. Il Signôr al è il gno pastôr: no mi mancjarà nuie.

Mi fâs polys là che i passons a sverdein,
mi mene là ch'a son aghis frescjis.
Al tire sù la mê vite, in gracie dal so non
mi mene par trois di justizie. R.

Ancje s'o ves di cjaminâ par une foranate scure,
di nissun mâl no varès pôre, parcè che tu mi sêts dongje;
il to baston e la tô vuiscje a son lôr che mi parin. R.

Tu prontis denant di me une taulade
presince dai miei nemîs,
il gno cjâf tu âs onzût di vueli
e il gno bocâl al è plen ch'al stranfe. R.

Propit, bontât e boncûr mi compagnaran

ducj i dîs de mî vite,
te cjase dal Signôr
par une vore di agns o restarai. **R.**

SECONDE LETURE Ef 2,13-18

Lui al è la nestre pâs, al à fat di doi popui une sole unitât.

De letare di san Pauli apuestul ai Efesins
Fradis, cumò in Crist Gjesù vualtris, che une volte o jeris i lontans, o sêts deventâts i vicins in gracie
dal sanc di Crist.

Di fat lui al è la nestre pâs
e al à fat di doi popui une sole unitât,
butant jù il mûr che ju divideve,
anulant te sô cjar la inimicizie,
cheste leç di comandaments cui siei ordins,
par rivâ a creâ in se, di doi popui, un sôl om gnûf
metintju in buinis,
e par riconciliâju ducj i doi cun Diu intun sôl cuarp
midiant de crôs,
dopo di vê copade in se la inimicizie.

Lui al è vignût par predicjâ la gnove de pâs
a vualtris, ch'o jeris lontans, e pâs a chei ch'a jerin vicins.
Midiant di lui, ducj i doi o podin presentâsi cun libertât
al Pari intun sôl Spirto.

Peraule di Diu.

CJANT AL VANZELI Zn 10,27

R. Aleluia, aleluia.

Lis mês pioris a scoltin la mî vòs, al dîs il Signôr,
jo lis cognòs e lôr mi vegnин daûr.

R. Aleluia.

VANZELI Mc 6,30-34

A jerin come pioris cence pastôr.

Dal vanzeli seont Marc

In chê volte, i apuestui si derin dongje di Gjesù e i contarin dut ce che a vevin fat e ce che a vevin
insegnât. Alore lui ur disè: «Vignît fûr di man, tun puest cidin, e polsait un pôc». Di fat chei ch'a
vignivin e a levin a jerin tancj che no vevin nanceje il temp di mangjâ. Alore cu la barcje a lerin tun
lûc cidin e fûr di man.

Ma une vore di lôr, che ju vevin viodûts a partî, a capirin e a scomençarin a cori là a pît di dutis lis
citâts e a rivarin prin di lôr. Dismontant de barcje, al viodè une grande fole e i fasè dûl parcè che a
jerin come pioris cence pastôr. Alore al scomençà a insegnâur tantis robis.

Peraule dal Signôr.

Su lis uiftis

Diu, che inte perfezion di chest unic sacrifici
tu âs consacrade la diférence cu lis vitimis de leç viere,
acete il sacrifici dai tiei servidôrs fedêi,
santifichilu come che tu âs santificât i regâi di Abêl
e ce che ognidun al ufris a la tô maiestât,
ch'al zovi pe salvece di ducj.
Par Crist nestri Signôr.

Antifone a la comunion Sal 110,4-5

Al à lassade memorie dai siei spetacui:
al à dûl il Signôr e al è bon di cûr,
ur à dade la bocjade a di chei che lu rispietin.

O ben: Ap 3,20

Ve: jo o stoï a la puarte e o tuchi, al dîs il Signôr.
Se un al scolte la mê vòs e mi vierç la puarte,
o jentrarai li di lui, o cenarai cun lui e lui cun me.

Daspò de comunion

Signôr, ti prein, cjale di bon voli il to popul
e, daspò di vêlu inscuelât cui misteris dal cîl,
dai di passâ de viere a la gbove vite.
Par Crist nestri Signôr.